

# Pablotenipa Tesaronicadenidsa ima teppe tahidecca dosse quinajaro

## 1 Tesalonicenses

Tesaronicapi dsama Masedoniacca odsa panani deni tojanicca, bica tajaro. Nahihuaji Pablopa Jeso tahimari icassiejeranijinecca maride toccajari. Tesaronicadenipa tahide Jesodsa ssamoqquiri napojari. Naraha dsotodena madija mota huapi taha Jesodsa jehe quinajari. Pablo huatimadedeni Silvano Timoteo tedseje maride toquejenajari. Maride toquejenahicca semana 3 nadsapa pohuadenidsa huadiquiri najaridenijine mohuaniji ssonarijaro. Nadsapa Pablo Silvano tedseje damama quinahitohuiraha odsa panani Bereahuaji dsome dsaja tajari. Najari tahimaridenipa Rocana dsodo inajaro, Jesocca dodosse tabaqqi tahimarideni capítulo 17'dsa.

Dsotodena Tesaronicahuajicca Jesodsa jehe quinajari tahimarideni Pabloteni mittamanadsa pohuadenidsa ajjaro ima teppe dosse quinajaro. Tesaronicadenipa nanajidso toquejenaraha Jeso inebomana-jarajari. Pocca-deni jeheniji dacorajaro. Nadsapa bodideni acco icamabaqqi-manahijine dsodo quinajaro. Diodsa madimanahissa tahijine tocahatterahijine dsodo quinajaro.

Dsotode Pablotenipa Tesaronicahuaji madimanajaridenidsa ima teppe onihi dsodo quinapomajaro.

### Pablotenipa nija quinajari

**1** <sup>1</sup>¿Nija imecotedeni? Ohua Pablo, Silvano, Timoteo inadsa tiadenidsa dsodo inajaro. Nani odsa panani Tesaronicacca Jesocristodsa jehe tiquinajaro titiqueriqui najaro icca Abi Diodsa, ia Medsede Jesocristo pohuadeni pamahadsa tijariquimanajarodenidsa icca ima dsodo inajaro. Abi Dio tiadenidsa ima bicani inanadsanapona, pocca jonehe naqui tiadenidsa inanasanapona, inajaro.

### Tesaronicacca Jesocristodsa jehe quinajari tahimarideni tojaridsajaro

<sup>2</sup>Diodsa huati inadsapi: –Jehe Abi Dio, epejeni. Tijine imecotedeni Tesaronicacca bicaquiri nahi –ihinanajaro. Titohuideni ibodi huatoma-dsanapodsapi Diodsa huati huati ihidsanapo najaro. <sup>3</sup>Jehe, Diodsa huatide iquejenadsapi ticcadeni ima bicani eti ajima-jerajaro. Ticcadeni jeheniji dacorajararo tidsepedeni ihijimana najaropaji.

Diocca dossehedsa tidsepedeni iji-manadsa naqui tohuati huanehema tidsepedeni ihijiridsamana najaropaji. Ia Medsede Jesocristocca tossiejehetohui timadimanadsapi tiadenidsa ocasserani ssonariraha tinahanamananjine dacoraquuri tiquinajaro. <sup>4</sup> Imecotedeni, Diopa tiadenidsa huati huana tadsa pocca cacatidse tabaqqi tiquejenajaro. Dio tiadeni tocattejidsabaquujaricca ima nahatoto inajaro. <sup>5</sup> Nadsama aji ia naqui Jesocristo tahimari icassiejeranjinecca tiadeni mari mari ihicanabaqqi nade. Etti poni motta ojari-jerani. Dio Corimecca dacorehema mari mari ihinanajaro. Pohuajine Dio Atti tiadenidsa tojajaro. Jesocristo tahimari paji inadsa huati huati inajaro. Tiadenidsa imadidsa naqui icca madie qqui tiquinade. Iapi deni iquejenanjine idsepe ijijerade. Dio Atti tiadenidsa tojanijinena idsepe ijijarode.

<sup>6</sup> Tiadenipi pina aji icca madiacca imassa, pina aja ia Medsede tahimari timittamanajaro pocca madiacca imassa tinamanajaropaji. Najaroa aji Dio Atti timittamanadsa jehe tiquinadsapi Dio Corimejine tetidsemanajaropaji. Aji ocasserani teridsamanaraha Dio Corimejine Dio Attidsara tetidsemana najaropaji. <sup>7</sup> Nema tiquinadsapi titahimari deni tojaridsajaro. Aja Jesocristodsas jehe quinajarideni ticcadeni dsama arobeni Masedoniadsa madimanagerideni, dsama arobeni Acaiahuaji madimanagerideni naco titahimari deni mittaridsamanajari. Nadsapa ticcadeni imajine pohuadeni bodi todacorani nadsa attidenipa: –Ia naqui pina Tesaronicacca

imecotedenissa inana –quina-jaripaja. <sup>8</sup> Tijinedeni Jesocristocca marinaja Masedoniahuaji mittamana, Acaiahuaji mittamana najaripaja. Naraha nahidsaha mittamanahi ojari najaraha. Dsama huapimaccanaco mittaridsamanahi. Aji Diosda jehe tiquinanissa tajarocca imapi dsama huapima nahatoquuri naridsahi. Nadsama aji dsama onihi onihi naridsanihuaji Dio Atti maride jaijaridsadsapi ticcadeni jeheniji tahimari nahatoquuri napojarijine huati inejerani pohuadenidsa. <sup>9</sup> Icca ima aji tiadenidsa bacco inaponicca ecomera-ridsanijineraha pohuadenina iadsa huati huati toquinade: –Aja Tesaronicahuaji Dio Atti mari ticanabaquipodsa naco tiadenidsa bicaquuri nade –quinajari. Aji ticcadeni siba nahatonidsa epeje tiquinanissa tajarocca ima naqui iadsa huati toquinade: –Poccadeni siba nahatonidsa: “Ia cacahuade” quiquinaporaha jidapapa Dio pajissa camitta tajaridsana: “Ia Cacahuade” quinajari. Manaco najaridsana iboraquuri najari –quinahi naqui imittade. <sup>10</sup> Dio Bedi memehuaji ccaronapomahitohui tinajoramanajaro naqui iadsa huati toquinadsa imittade. Najaripa Jeso dsoqqueraha Imehi Diojine nahatonijari. Nidsa Diocca najidsohue oppina tanicca bacco tadsapi Jeso pohuajinena dsori icaniredsas icassiejeranitohui, inajaro.

**Pablodenipa Tesaronicacca  
madija maride dsepedeni  
ijimanajari**

**2** <sup>1</sup> Imecotedeni, tiadenipi icca ima nahatoquuri tiquinani: Tiadenidsa imadidsapi ponima

imadi-gerade. <sup>2</sup>Tahide tidsamari-denihuaji bacco inejeraccadsapi odsa panani Piripocca madija Dio Atti mari icanabaququidsapa nahihuajicca madija motapa ia totamasso-baqquimana, ia tonajidso-baqquimana nade. Nadsama najaro imapi nahatoqquri tiquinani. Aja tiadenihuaji naco madija mota: –Dio Atti imitta-gerana –quinadsapa iadsa huadiqquri nade. Naraha Diojine cappineraqquri inadsa pocca ima bicani icassiejeranijinecca tiadeni mari icanabaququiarode. <sup>3</sup>Najaro ima bicani tiadeni mari icanabaququidsa naqui pajiranissa inanade. Tabaccorehe inananijine tiadenidsa huati ineje cama-gerade. Maidsehdsa naqui tiadenidsa maidsa maidsa inejerade. <sup>4</sup>Dio jipa tahiccana huati huati ihinajarode. Dio ia tonocodsabaququidsa iadsa: –Ticcadeni ima bica tani –nanaja nade. Icca ima Dio Puhuadsa bica tadsapi Dio Puhuana ia tocadossebaququidsa Jesocristo tahimari icassiejeranijinecca mari mari ihicanabaququi najari. Aja madija iadsa huatidsemanahijine inadsa dissessera inejerani. Dio iadsa huatidsehijinena dissessera inajaro. Puhuana ibodicca ima qquide nahato tajari. Imaisa-gerani nahato tajari. <sup>5</sup>Tiadeni naqui icca ima nahatoqquri tiquinani: Tiadenidsa imadidsapi dsinirotuhi tiadenidsa etti bicaca tadsa huati huati inejerade. Ticcadeni dsinirotuhi naqui tiadenidsa ihimaisa nejerade. Pajissa najaro tohuini inejerani Dio nahato tajari. <sup>6</sup>Tettideni naqui iadsa: –Bicaqquri tiquinani, deni tiquejenani

–tiquinanijine tohuini inejerade. Madija ohuahadeni naco attideni nama quinahijine tohuini inejerade. <sup>7</sup>Naraha iapi Jesocristocca dodosse tabaqqi iquejenadsapi tiadeni dossedde ipajiraraha nema inejerade. Tiadenidsa imadidsapi mohuaradsa tohuati huanehema tiadeni mari mari ihicanabaququi najarode. Pina amoneje ponicca ejedeni inanapihijine ecahuajarissa inajarode. <sup>8</sup>Tiadenidsa eti huana tadsa Diocca ima bicani icassiejeranijinecca tiadenidsa ecomeranijine jipapa inajarode. Najaro jipapa inadsapi ia essire eccoradsa ijicanijine naqui bica tani, inade. Etti nema inajaropi tiadenidsa eti cahanari canajaro.

<sup>9</sup>Imecotedeni, tiadenipi idsepe ijiecca ima tetideni ajima-gerani. Imadinicca icajinijine idsepe ijide dissessera inadsapi ssiaja idsepe iji, dsome naqui idsepe iji najarode. Nema inadsa Diocca ima bicani icassiejeranijinecca tiadeni mari icanabaququidsapi tiadenidsa icca madie najo tejeranijine ticcadeni dsinirotohui, ticcadeni dsamatapatohui huati huati inejerade. <sup>10</sup>Jehe, tiadenidsa imadidsapi ia qqui tina-baqquimanade. Dio naco ia qqui tabaqquide. Diotohuira inadsapi ia ecahuanissa tadsa imadjarode. Ima icappirehe imadide. Jesocristocca tiquejenajarodenidsa ima tabaccora tanicca inana-gerajaro. Nohuerade. <sup>11-12</sup>Icca ima onihinaqui nahatoqquri tiquinani. Tiadeni ihinahatidsebaququi najaropi pina aja madija pocca ejedeni bodideni acco icamabaqqujarissa inajarode. Oji oji tiquinadsa naqui tetideni ihinassonabaququi nade. Aja Dio titohuideni huahua

najaripa pocca cacahuehehuaji tiquejenanijine, Pohua dsibehine, pocca deni tojehe qqui tiquinanissa taniijine. Pohuajine tiadenidsa ima nema nadsapi tiadenidsa: –Diodsa timadimananissa taji –ihinanajaro.

<sup>13</sup>Ticcadeni ima Diodsa huati huati ihinanadsapi: –Jehe, \*epejeni. Tijine bica tani –ihinanajaro. Aji Diocca marinaja tiadeni mari icana-baqquijarodsapi: –Madija attia –tiquinejerade. –Ajijaro mari-najapi pajissa Dio Attia. Iadsa tojana –tiquinade. Dio Atti pajissaccara tiadeni mari icana-baqquijarode. Pohuadsa pajissa tiquinadsapi Pohua Atti tibodidenidsa tojajaro-jinea aji tibicamana-dsanapojaropaji. <sup>14</sup>Naraha imecotedeni, Diodsa pajissa tiquinadsapi ticcadeni dsamacca madijaraha tiadeni nanajidso totonana-baqquimana najari. Najaro imapi pina aja dsama arobeni Jodeahuajicca imecotedenicca imassa najaro. \*Jodiodeni Jesodsa jiperaquiri najaridenipa poccadeni madija Diodsa quequeriqquimana nahicca, aja Jesocristodsa jehe quinajarideni nanajidso ihinanabaqquimana najaride. <sup>15</sup>Aja jodiodenipa Jeso inanadsoqqemanadsa pina aja poccadeni madija maittaccadsama Dio Atti cacomeraqquri najarideni ihinanadsoqqeridsamana najarissa inanamanajari. Najaria aja jidapana iadsa naco mohua mohua quiquinanajaripaja. Diodsa naco bicaquiri najarahi. Madija huapimadsa naco jiperaqquri nahi. <sup>16</sup>Nadsapi Jesocristo tahimari icassiejeranijinecca jodio quejena-jarajarideni mari icana-baqquihijineraha aja jodiodeni Jesodsa jiperaquiri najaridenina

iadsa mohua mohua quiquinanajaripaja. Najaridenipa jodio quejena-jarajarideni Jesocristocca imadsa tocassiejerahijine jiperaquiri najari. Nadsapi poccadeni imasiri denima tojadsanapojaropaji. Najaro poccadeni imasirijinena Diocca huadie pohuadenidsa tojanitohui. Nidsa najidsohue oppina taniccapi pohuadenidsa ssonarinitohui.

**Pabloa: –Tesaronicahuaji occanipomana –najari**

<sup>17</sup>Imecotedeni, tiadenihuaji imadiporaha dsotode odsa onihihuaji jaijadsapi tiadenidsa iajijini nanicca huada tohuapini. Tiadeni qqui inabaqqui-jeraraha titohuideni eti huahuatoma najaro. Tiadeni qqui inabaqquipomanijine tohuini inadsa: –Jaijanipomana –ihinanajaro. <sup>18</sup>Tiadenihuaji jaijapomanijine tohuini inadsa icca benehi inajora inajora najaro. Aji ohua Pablo naqui tiadeni qquide occaninijine onajora onajora najaro. Naraha Diocca huadi Satanajine icca benehicca ima tossamo tossamo neneje najarode. <sup>19</sup>Tiadeni qquide bacco inadsapi etidsenijine tohuini imadijaro. Tiadenina icca huatidsehe. Nidsa Jesocristo ccanipomadsa ticcadeni imajine pohua tedseje etidse-nitohui. <sup>20</sup>Ticcadeni ima ecomeradsapi: –Poccadeni ima bica tani –ihinanajaro. Pajissa tijinedenina ehetidse najaro.

**3** <sup>1-2</sup>Odsa panani Atenahuaji imadidsapi: –¿Nejecoma quinahi? Qqui inabaqquipomaccaraho –ihinanajaro. Najaro iadsa tocasserani nadsa ticcadeni ima nahatoto inanijine: –Jari, Timoteora dosse inanina, iapi

Atenadsa imadiccana –inajarode. Aja Timoteopa Diocca dodosseja najari. Iadsama Jesocristo tahi-mari icassiejeranijinecca mari mari nanaridsa nahi. Najarina nahi tiadenihuaji dosse inanijari, tibodideni acco tocamabaquid-sa ticcadeni jeheniji todacorani nanijine. <sup>3</sup>Timoteo nama nadsapa ima tiadenidsa ssonaridsapi tijaparimana-jeranitohui. Tiadenipi nahatoqquri tiquinani: Jesocristo-cca tiquejenadsapi ocasserani temanitohui. <sup>4</sup>Nadsama najaro imapi tiadenidsa imadisa huati inapode: –Jesocristodsa tiquejena-jarojinepi tiadenidsa ima ocassera tanicca ssonarinitohui –inade. Jidapapi najaro ima tiadenidsa pajissa tojani nahatoqquri tiquina-jaropaji. <sup>5</sup>Nema nadsapi ticcadeni ima nahato onaccaraho onadsapi tiadenihuaji Timoteo dosse onanijaripaja. ¿Jesocristodsa ticcadeni jeheniji dacoraqui? ohonanajaro. Aja Diocca huadi Satanapa tiadeni tonehedima-baqquihijine dissera tahi. Naraha obodi: ¿Satanacca maidsehedsa toquejenaco? onadsa ocappinajaro. Nema tiquinadsapi aji tiadeni mari icanabaqquijaro ponima tojapadseje, onajaro. <sup>6</sup>Naraha Timoteo timadimanani Tesaronicahuaji toccanidsa ahuaji ccanidsapa ticcadeni ima bicani huati nanijari. Aji Jesocristodsa ticcadeni jeheniji dacoranicca ima, aji tetideni cahanerara cananicca ima, aji ticcadeni huatidsehema iadsa tetideni ajimamana nejera-jarocca ima naqui huati nanijari. Ia qquide naqui tohuini tiquinani, pina ia tiadeni qqui inabaqqui-nijine tohuini inajarossa tiquinajaro

naqui iadsa huati nanijaride. <sup>7</sup>Imecotedeni, iapi ima najo tani-ccadsa imadi, ocassera taniccadsa imadi naraha aji Jesocristodsa jehe tiquinanissa dsanapojarocca ima iadsa bacco nanidsapi ibodi tobica-ridsajaro. <sup>8</sup>Jesocristodsa ticcadeni jeheniji todacorani dsanapodsapi ia naqui denima etidsedsa imadijaro. <sup>9</sup>Nadsama Dio Puhuajine ticcadeni ima bicani tojadsapi huatidsehe imeni icajini. Pahuadsa etidsedsa: –Jehe, bica tani –inaraha ¿nejeco-jaro tohuatti denima bica tanicca Puhuadsa huati inanijine pajirani? Onihi nohuerani. <sup>10</sup>Tiadeni qqui inabaqquipomaniine inadsa Diodsa huati huati ihinanadsapi dsome, ssiaja huati huati inajaro: –Abi Dio ¿ettidsa jehe taqui? Puhuadeni qquide tohuini inani. Jesocristocca marinaja denima tocahatterahijine maride jajianipomana –ihinana-jaro. <sup>11</sup>Tiadeni qquide jajianipoma-nijinepi icca Abi Dio, ia Medsede Jesocristo tedseje ia acco tocamabaqquiமானahijine jipapa inajaro. <sup>12</sup>Ia Medsede tibodidenidsa tohuati huanehe denima inanadsanapo-nijine, inajaro. Puhuajinena denima tetideni cahanerara cananijine, inajaro. Madija ohuahadenidsa naqui tetideni huanaqquri nanijine, pina aji ia tiadenidsa eti huana tajarossa tiquinanijine jipapa inajaro. <sup>13</sup>Ia Medsedejine tibodideni todacorani nanijine, inajaro. Nadsapi nidsa ia Medsede Jesocristo puhuadsa toque-jenajaridenima ccanipomadsapa icca Abi Dio baccohuaji idomo huadsa aji tibodideni huireqquri nadsa imasiri jirehe timadimana-jonajaropi ahuato tanijine, inajaro.

**Iceca madie ajima nadsana  
Dio huatidsejari**

**4** <sup>1</sup>Imecotedeni, jidapapi ia Medsede Jeso onima tiadenidsa huati inanissa tanijine. Tiadeni mari icanabaqqipojarossa tinanamanani Dio qqui tadsapa tiadenidsa huatidsehitohui, ihinanade. Jidapana nema tinanamanadsapi nema tinanamana-dsanapoji, inajaro.

<sup>2</sup>Tiadeni mari icanabaqqijarojine iceca marinaja nahatoqquri tiquinani. Iapi Jesocristo ia tocadossebaqquidsa tiadeni mari icanabaqquijarode. <sup>3</sup>Dio Pohua jipa tahiccapi ajima najarona paji: Tibodideni ssiaja, huire tadsa imasiri jirehe timadimananijine. Nema tinanamananijinepi huananehecca tinanamana tejeraji. <sup>4</sup>Diopa aja maqquideje amoneje cajjaripa pocca amonejera inajari-dsanaponijine jipa tajari. Nani ticcadeni amonejedsa tetideni huaaqquri nadsa ticcadeni amoneje tecahumananissa tanijine. <sup>5</sup>Nema tiquinaadsapi pina aja Diodsa ssamoqquri najaridenissa tiquinejeranijine. Pohuadenipa Diodsa ssamoqquri nadsa pohuama tohuini quinaadsa huananehedsa caji caji cacana najari. <sup>6</sup>Timecote Jesocristodsa jehe najaricca amoneje, amoneje onihi naqui tijamana tejeraji. Timecotecca amoneje tijadsapi pina timecotedsa nanajidso tajarossa najaro. Nadsa tiadenidsa huati inapode: –Paji, nema najaro imapi oppina tani –ihinanapode. Nema najaro ima tinanamanadsapi Dio tiadeni tonajidso-baqquihitohui. <sup>7</sup>Diopa imasiri inananijine itohui

huahua najarahi. Imasiri inanajeranijinena itohui huahua najari. Diopa ibodi huire, ssiaja tanijinena itohui huahua nanaja najari. <sup>8</sup>Ajjaro marinaja madija ettajomanadsapi madija atti ettajomana-jarahi. Dio Attina ettajomanajaro. Pina Dio Pohua Corime iadsa da inajari huahuattajo inananamanajarissa najaro.

<sup>9</sup>Nadsama timecote Jesocristodsa jehe quinajarideni tedseje tetideni cahanerara cananicca imapi nahatoqquri tiquinani, Dio Pohuana tiadeni mari tocanabaqquipodsa. Nema nadsapi najaro ima tiadenidsa dsodo onejerani. <sup>10</sup>Najaroa aji dsama arobeni Masedoniahuajicca timecotedeni huapimadsa tetideni huaaqquri najaropaji. Naraha iapi tiadenidsa huati inajaro: Ticcadeni tohuati huanehe denima tinanamanaji, inajaro. <sup>11</sup>Mohuaradsa timadimananissa tanijine tibodideni huatonissa taji, inajaro. Pina ticcadeni imadsara tibodideni huatomanaji. Madija ohuahacca imadsa tiquejemamana tejeraji, inajaro. Mohuaradsa tidsepedeni ijrirdsamananissa taji, inajaro. <sup>12</sup>Nema tiquinadsapi madija ohuahadeni ticcadeni ima bicani qqui toquinaadsapa: –Pohuadeni cacahuade nahatoqquri nahi –quiquinanahijine. Tidsepedeni ijimana-nissa tadsa naqui ticappiramanageranijine, inajaro.

**Ia Medsede ccanipomahi  
tahimari**

<sup>13</sup>Imecotedeni, ssamoqquri tiquinejeranijine ticcadeni madija dsodoqquemana najaricca ima tiadenidsa dsodo inajaro. Aja

madija Jesocristodsa ssamoqquiri najaridenipa poccadeni madija dsoqquedsa oji oji quinadsapa: –¿Icca madija qqui imanijarapadsaja? –quiquinanajari. Naraha tiadenipi pina pohuadenissa tiquinejeranijine Jesocristocca madija dsodsoqquemana najaridenicca ima timittamanaji. <sup>14</sup>Aja Jeso dsoqqueraha nahatonijaridsa pajissa inadsapi nahatoto inajaro. Najaria aja Jesodsa pajissa quinarari dsoqqueமானajarideni naco pina Jeso Dio inahatonijarissa quinarahitohui.

<sup>15</sup>Ajjaropi ia Medsedecca marinaja tiadenidsa huati inajaro. Ia Medsede ccanipomadsa imadinipaji nadsapi iaha tahide ia Medsededsa bacco inapojeranitohui. Aja imecote jicapojaridenina pohuadsa bacco bacco toquinapohuitohui. <sup>16</sup>Jehe, ia Medsede ccaronahijinepa tahide memehuaji atti mohui taha huahua nahi imittanitohui. Diocca dodosse tabaqquidenicca tamine naco huahua nahi atti imittanitohui. Diocca jejeidsa jei jei nahi naco imittanitohui. Nadsana Jesocristo memehuaji ccaronadsapa pohuadsa pajissa quinapojari jicapojarideni tahide nahatimanahitohui. <sup>17</sup>Dsotodena aji ia camittaquiri inajaro jicapojarideni tedseje huapima ia tohuaccamaccossani-baqquihitohui. Meme essenima jajamacossanitohui. Meme napicossanidsa ia Medsede tedseje bacco icananitohui. Nadsapi ia Medsede Jesocristodsa imadi-dsanaponitohui. <sup>18</sup>Nadsama najaro imadsa timecotedeni tedseje taticatidserara canana, onajaro.

### Jesocristo ccanihitohui ibodi huatohue imadina

**5** <sup>1</sup>Naraha imecotedeni, aja Jeso ccanihicca huada tahi-marini tiadenidsa huati onapode. Nadsapi dsodo onejerani. <sup>2</sup>Aja ia Medsede Jeso ccanihicca huada bacco tanicca imapi nahatoqquiri tiquinani. Najaropi ajima napode: Eti ajimama canaraha ccanihitohui. Pina dsome bobotide icca odsadsa botide qquedsimahicca ima ssamo inajarossa nahitohui. <sup>3</sup>Jeso ccanihicca huada bacco tabote nadsapi madija attidenipa: –Jidapapi jadsire tomossi, oppinehe tomossi najaro –quiquinanaraha amadsati pohuadenidsa oppina tehe ssonaridsapi dsori taja cama-jarahitohui. Pina ejedeni comahicca huada amonejedeni ssamoqquiri najarossa najaro. Amadsati tosso-nahijinecca huada bacco tadsa amonejepi ejedeni comene dsori teje cama-gerani. <sup>4</sup>Naraha imecotedeni, tiadenipi ssamoqquiri tiquinejerani. Dsidsinidsa timadimana-gerani. Nidsa ia Medsede ccanihicca huada bacco tadsapi pina bobotidejine odsa jinede jabojo najarissa tiquinejeranitohui. <sup>5</sup>Diodsa tiquejenajaropi pina ssiajanidsa timadimanajarossa tiquinani. Dio ssiejene tiadenidsa ahuato tajaro. Iapi dsidsinidsa madimanajaridenissa inejerani. <sup>6</sup>Pina najarideni pohuama cahadijararissa inejerana. Icca madie ecahuanissa dsanapona. Jesocristo tohuira ibodi huatohue imadina. <sup>7</sup>Aja Jesocristo ccanihitohui bodideni huatojararidenipa dsidsinidsa madimanajarari. Dsomepa cacahadija najari.

Noccodeni janoqquri nahijine tohui quinadsa naco dsomedsa coma tanicca dse dse quinajari. <sup>8</sup>Naraha iapi ssiajanicca madija iquejenajaropi inocco janoraqquri nehe imadijaro. Ibodi huatohue imadijaro bica tani. Iapi pina soldado jadsiredsa biquera-jarahijine pohua bacco cacahuahijine ccara tanicca caji, pohua tati cacahuahijine ccara tanicca caji najarissa inana. Imasiri inana-jeranihijine ia ecahuanijinepi Diodsa icca jeheniji icaji, Diocca tohuati huanehe icaji najaro. Icassiejeranihijine tohuini inajorehe imadijaropaji. <sup>9</sup>Dio ia tocatejidsa-baqquijaripa ia tonajidsobaqquihijine jarahi. Dio ia tocatejidsa-baqquijaripa ia Medsede Jesocristo ia tonassiaja-baqquihijinena paja. <sup>10</sup>Jesocristo itohui pohua ccaccoradsa dsoqqejari. Nama najaripa camitta inaccadsa, idsoqquedsa naqui pohuadsa imadinitohui. <sup>11</sup>Nadsama tiadenipi timecotedeni tedseje ticatidserara canaji. Ticcadeni jeheniji todacorani nanijine naqui acco acco titicana naji. Najarossa tinanamanajaropi nema tidsanapomanana, inajaro.

–Ajima tiquinanisa  
bica tani –quinajari

<sup>12</sup>Imecotedeni, tiadenidsa huati inana. Tiadeni maridedenidsa bicaqquri tiquinaji. Attidenidsa naqui pina titaharibobo canaji. Tiadeni maridenipa ia Medsede Jesocristodsa tiquejenajaro cacahuade toquejenadsapa dsepedeni iji-manahissa tajari. Timadimananissa tanijine tibodideni acco acco totocamabaqquimana najari. <sup>13</sup>Dio Atti tiadeni mari tocanabaqquidsa

naco: –Jehe, pohuadenipa iadsa bicaqquri nahi –titiquina naji. Pohuadenidsa tetideni huanacquiri naji, inajaro. Huapimadsa joneqquri tiquinehe timadimanaji, inajaro.

<sup>14</sup>Imecotedeni, tiadenidsa denima huati inana. Madija dsepe ijihijine ibo tadsapa tettideni dacoradsa huati ticanamanajo, dsepe ijide ibora tahijine. Madija bodi ocassera tadsa Jesodsa: –Epeje onana –nabote nadsapa pohua tinahatidsemanajo, Jesodsa tojanihijine. Madija pocca jeheniji tomijiradsa pohua bodi acco ticamamanajo, pocca jeheniji todacorani napomanijine. Madija huapimadsa joneqquri tiquinaji. Pina madija tiadenidsa ima inassonaridsapi pohuadsa tedimanageradsa \*mohuaradsa tinahamanaji, inajaro.

<sup>15</sup>Madija tiadenidsa ima inandsapi: –Manaco pohuadsa ima onanana –tiquinejeraji. Tabacorehe tinanamana tejeraji. Ima bicanira tinanamananijine disseraqquri tiquinaji. Timecotedenidsa, madija ohuaha huapimadsa naqui ima bicanira titinanaridsamana nana, inajaro.

<sup>16</sup>Huajijiradsa tetetidsemana naji. <sup>17</sup>Dio Pohuadsa ssiaja huati, dsome huati tidsanapomanana naji. <sup>18</sup>Aji ocasserani temanadsa, ima bicani tiadenidsa tojadsa naqui Diodsa huati huati titiquina naji. Pohuadsa: –Jehe, epejeni. Tijine bica tani –titiquina naji. Diopa aja Jesocristodsa jehe quinajarideni attideni nama quiquinanahijine jipa tajari.

<sup>19</sup>Dio Corime tiadenidsa madijaripa joma tinanamana-jarana.



<sup>20</sup>Madija Dio Corimejine Dio Atti ecomeradsapi tettideni: –Maidsa maidsa najari –tiquinejerana.

<sup>21</sup>Madijadenicca marinaja huapima titaharibobo canadsa: –¿Pina Jesocristo tahimarissa naqui?

–titiquina nana. Najarossa nadsapi tibodidenidsa tojanijine bica tani.

<sup>22</sup>Naraha ima tabaccora taniccapi tibodidenidsa tinanamana tejeraji. Tiajimanani nanina bica tajaro.

<sup>23</sup>Dio Puhua jonehe jinede.

Dio Puhua tibodideni tonahire-baquihihisa tahijine, inajaro. Dio Puhua ticorimedeni, tibodideni, tessiredeni nehe ecahuanissa tajaro, imasiri ticappiramanene ia Medsede Jesocristo pohua ccanipomahi bacco tiquinanijine, inajaro. <sup>24</sup>Abi Dio titohuideni huahua najaripa maidsera tahi. Tiadenidsa Pohua Attissa inananitohui. Aji huati

onajaropi tiadenidsa inananissa tanitohui.

**Huapimadsa: –Jesocca biquehe tiadenidsa tojana –quinajari**

<sup>25</sup>Imecotedeni, Dio ia acco tocamabaquihijine itohui naqui Pohuadsa huati huati titiquina naji.

<sup>26</sup>Timecotedeni Jesocristodsa jehe quinajarideni huapima bacco bacco ticanadsapi nija tiquinadsa dama, ticahuajacossa titiquina naji, inajaro.

<sup>27</sup>Aja ia Medsedejine ohuatti ocajidsa tiadenidsa ajima onajaro: Timecotedeni huapimadsa ajijaro ima teppe hua taridsamanaji, onajaro.

<sup>28</sup>Ia Medsede Jesocristo tiadenidsa ima bicani inanana, inajaro.

Epejeni. Ia onipi Pablo, Silvano, Timoteo inajaro.